

Hfz. Nedžad Vehabović  
Behram-begova medresa u Tuzli

# HAFIZI BEHRAM-BEGOVE MEDRESE U TUZLI

## Uvod

Behram-begova medresa u Tuzli, kao najstarija odgojno-obrazovna institucija u sjeveroistočnoj Bosni, i njeni muderrisi, inspirisani kur'anskim ajetima i hadisima Muhammeda a.s. koji govore o vrijednosti učenja Kur'ana napamet, na svoje učenike prenose želju i podstiču ih na putu sticanja zvanja hafiza Časnog Kur'ana. U periodu obnovljenog rada Behram-begove medrese, od 1993. godine do danas, ova odgojno-obrazovna ustanova je promovisala sedamdeset i jednog hafiza.

U prošlim brojevima Kapije, godišnjaka Behram-begove medrese u Tuzli, predstavili smo hafize Medrese u periodu od 1993-2017. godine. U tom periodu hifz je završilo pedeset i šest učenika i svršenika Behram-begove medrese. U ovom radu predstavljamo hafize Behram-begove medrese koji su najčasniju titulu stekli u 2018. i 2019. godini.

**57. Hfz. Maida Ramić**, kćerka Muhameda i Amire, rođena je 18. 4. 2000. godine u Tuzli. Osnovnu školu "Mramor" u Tuzli završila je kao učenik generacije. Mektebsku nastavu je pohađala u džematu Dobrnja, pred muallimom Ibrahim-ef. Softićem. Učestovala

je na mektebskim takmičenjima iz općeg znanja i kiraeeta. Nakon osnovne škole upisala se u Behram-begovu medresu u Tuzli, koju je završila s odličnim uspjehom i primjernim vladanjem. Hifz je počela učiti u prvom razredu Medrese, pred hafizom Amenom Jusufović. Hifz je polagala pred Komisijom za hifz Rijasetu Islamske zajednice u BiH u periodu od 24. 12. 2017. godine do 8. 1. 2018. godine. Hafiska dova joj je proučena 30. 1. 2018. godine u Džamiji Behram-begove medrese u Tuzli. Nekoliko godina je učila žensku hafisku mukabelu u Gazi Turali-begovoj džamiji u Tuzli. Trenutno je studentica prve godine na Internacionalnom univerzitetu u Sarajevu, smjer softverski inženjering.

**58. Hfz. Lamija Spahić**, kćerka Mirnesa i Emsije, rođena je 17. 9. 2000. godine u Tuzli. Osnovnu školu "Novi Grad" u Tuzli završila je sa superodličnim uspjehom. Mektebsko obrazovanje stekla je u džematu Džamije "Kralj Abdullah" pred hfz. Edin-ef. Peštalićem. Bila je polaznica Škole Kur'ana MIZ Tuzla. U Behram-begovu medresu se upisala 2015. godine, i iste godine se uključila u Sekciju hifza. Hifz je završila za tri godine. Hifz je polagala pred Komisijom za hifz Rijasetu Islamske zajednice u BiH, u periodu od 2. 4. 2018. godine do 16. 4. 2018. godine. Hafiska dova joj je proučena 10. 5. 2018. godine, u Džamiji Behram-begove medrese u Tuzli. Tri godine zaredom je učila žensku hafisku mukabelu u tuzlanskim džamijama. U maju 2018. godine je dobila priznanje muftije tuzlanskog, Vahid-ef. Fazlovića za uloženi trud u sticanju časne titule hafize Kur'ana Plemenitog. Muhaffiz hafize Lamije je bio njen babo, hafiz Mirnes-ef. Spahić. Studentica je prve godine Prirodno-matematičkog fakulteta u Sarajevu, smjer inženjerska mikrobiologija.

**59. Hfz. Emina Bećarević-Bilalić**, kćerka Mehe i Mirsade, rođena je 25. 6. 1993. godine u Tuzli. Osnovno obrazovanje stekla je u Banovićima. Nakon osnovne škole upisala se u Behram-begovu medresu u Tuzli, koju je završila 2012. godine s odličnim uspjehom. Školovanje je nastavila na Fakultetu islamskih nauka u Sarajevu, teološki smjer, na kojem je diplomirala u maju 2016. godine. Hifz je polagala pred Komisijom Rijasetu Islamske zajednice u BiH, u periodu od 18. 6. 2018. do 2. 7. 2018. godine. Hafiska dova joj je proučena 15. 7. 2018. godine u Islamskom centru u Banovićima. Njen muhaffiz je bio mr. hfz. Abdulaziz Drkić. Udata je i majka je jednog djeteta.

**60. Hfz. Lejla Begunić**, kćerka Jasmina i Mirsade, rođena je 5. 6. 1999. godine u Tuzli. Živi u Srebreniku. Osnovnu školu završila je u Srebreniku sa superodličnim uspjehom, a 2015. godine se upisala u Behram-begovu medresu u Tuzli, koju je završila 2019. godine, također sa odličnim uspjehom. Tokom pohađanja mektebske nastave učestvovala je na raznim takmičenjima, a 2015. godine osvojila je prvo mjesto na nivou Rijaseta, u kategoriji - test općeg znanja. Hifz je počela učiti u trećem razredu Medrese, pred svojim profesorom kiraeta hfz. Edin-ef. Dedićem. Učenje hifza je završila za godinu dana. Hifz je polagala pred Komisijom za hifz Rijaseta Islamske zajednice u BiH, u periodu od 1. 12. 2018. godine do 15. 12. 2018. godine. Hafiska dova joj je proučena 27. 12. 2018. godine u Džamiji Behram-begove medrese u Tuzli. Trenutno je studentica prve godine Farmaceutskog fakulteta Univerziteta u Tuzli.

**61. Hfz. Emina Momković**, kćerka Smaje i Mensihe, rođena je 26. 12. 1999. godine u Zenici. Živi u Zavidovićima. Završila je Osnovnu školu "Kovači" u Zavidovićima s odličnim uspjehom. Nakon osnovne škole, školovanje je nastavila u Behram-begovoj medresi u Tuzli, koju je završila 2019. godine. Prve harfove i sufaru je naučila u prvom razredu osnovne škole, u mektebu pred Emir-ef. Bečićem. Učestvovala je na mektebskim takmičenjima iz kiraeta, gdje je ostvarila zapažene rezultate. Učila je žensku hafisku mukabelu u Turali-begovoj džamiji u Tuzli. Hifz je počela učiti u prvom razredu Medrese, u septembru 2015. godine. Hifz je polagala pred Komisijom za hifz Rijaseta Islamske zajednice u BiH, u periodu od 20. 12. 2018. do 3. 1. 2019. godine. Njen muhaffiz je hfz. Abdullah-ef. Kapo, profesor u Behram-begovoj medresi. Trenutno je studentica prve godine Farmaceutskog fakulteta u Tuzli.

**62. Hfz. Zejd Špijodić**, sin Age i Asmire, rođen 24. 12. 2000. godine u Tuzli. Završio je Osnovnu školu "Ivan Goran Kovačić" u Gradačcu sa superodličnim uspjehom. Tokom devetogodišnjeg školovanja, učestvovao je na takmičenjima iz historije, geografije, vjeronauke i demokratije, a bio je i aktivni učesnik Literarne i Novinarske sekcije.

Pohađao je mekteb Reuf-begove džamije i učestvovao na više takmičenja. U osmom i devetom razredu osvojio je prvo mjesto u kategoriji - kiraet. U Behram-begovu medresu u Tuzli se upisao 2016. godine. Trenutno je četvrti razred Medrese. Hifz je polagao pred Komisijom za hifz Rijaseta Islamske zajednice u BiH, u periodu od

7. 1. 2019. godine do 21. 1. 2019. godine. Njegov muhaffiz je hfz. Mirnes-ef. Spahić. Hafiska dova mu je proučena 16. 2. 2019. godine, u Reuf-begovoj džamiji u Gradačcu.

**63. Hfz. Salih Đonlić**, sin Edina i Mirele, rođen je 3. 7. 1996. godine u Hamburgu, Njemačka. S porodicom se odselio u Ameriku 2000. godine. Osnovnu školu, te prvi i drugi razred srednje škole završio je u Americi. U Behram-begovu medresu u Tuzli se upisao 2012. godine, a završio 2016. godine. Nakon Medrese, upisao se na Fakultet islamskih nauka, imamski smjer, na kojem je trenutno vanredni student druge godine. Hifz je počeo učiti u Medresi pred hfz. Mirnes-ef. Spahićem, a nastavio na Fakultetu pred hfz. Kenan-ef. Musićem. Hifz je polagao pred Komisijom za hifz Rijasetta islamske zajednice u BiH, u periodu od 25. 1. 2019. godine do 8. 2. 2019. godine. Hafiska dova mu je proučena 3. 3. 2019. u Džamiji "Dobrinjske gazije" u Nedžarićima. Trenutno je zaposlen kao imam u Detroitu, Mičigen, USA.

**64. Hfz. Asmir Imamović**, sin r. Fadila i Naile, rođen je 25. 10. 1976. godine u Vukovijama Donjim, općina Kalesija. Osnovnu školu „Hamza Hamzić“ u Vukovijama završio je 1991. godine. Iste godine upisao se u Gazi Husrev-begovu medresu Sarajevu, koju je završio 1996. godine. U prvoj poslijeratnoj generaciji, u oktobru 1996. godine, upisao se na Fakultet šerijatskog prava na Univerzitetu El-Azhar u Egiptu. Na Fakultetu za šerijatsko pravo Univerziteta El-Azhar diplomirao je 2000. godine. Radio je kao vjeroučitelj u Osnovnoj školi „Tušanj“, u školskoj 2003/2004. godini. Nakon toga, 2004/2005. godine je radio kao imam, hatib i muallim u džematu Gračanica Selo, MIZ Živinice. Od 2005. godine radi u Behram-begovoj medresi, prvo kao profesor odgajatelj, a od 2013. godine kao profesor na predmetu Akaid. Aktivno govori arapski i engleski jezik. S arapskog jezika preveo je nekoliko djela. Hifz je počeo učiti kao učenik Gazi Husrev-begove medrese pred r. hfz. Mahmud-ef. Traljićem. Tokom školovanja na El-Azharu nastavio je sa hifzom Kur'ana. Pred muhaffizom hfz. Amir-ef. Hodžićem obnovio je ranije naučeno, te završio hifz Kur'ana Časnog. Hifz je polagao pred Komisijom za hifz Rijasetta Islamske zajednice u BiH, u periodu od 8. 4. 2019. do 19. 4. 2019. godine. Hafiska dova mu je proučena u Džamiji Behram-begove medrese, 11. 6. 2019. godine. Oženjen je Meliha-hanumom i otac je dvoje djece, Fadila i Merjeme.

**65. Hfz. Abdulah Okanović, sin r. Omera i Fatime,** rođen je 24. 9. 1990. godine u Diviču kod Zvornika. Osnovu školu je završio u Slavinovićima, 2005. godine. Mektebsku nastavu pohađao je u mektebu Bijele džamije u Slavinovićima, pred muallimom Ismet-ef. Avdibašićem. Nakon osnovne škole upisao se u Behram-begovu medresu u Tuzli, koju je završio 2009. godine. Iste godine se upisao na Fakultet islamskih nauka u Sarajevu, na kojem je diplomirao 2013. godine. U periodu od 2010. godine do 2013. godine radio je kao honorarni imam Sarač-Ismailove džamije u Sarajevu. Od 2014. godine imam je Bijele džamije u Slavinovićima, MIZ Tuzla. Trenutno je student na postdiplomskom studiju Fakulteta islamskih nauka u Sarajevu. Hifz je učio pred hfz. Mirnes-ef. Spahićem. Hifz je polagao pred Komisijom za hifz Rijaseta Islamske zajednice u BiH, u periodu od 12. 4. 2019. do 26. 4. 2019. godine. Hafiska dova mu je proučena u Bijeloj džamiji u Slavinovićima, 16. 6. 2019. godine. Oženjen je Mihreta-hanumom i otac dvoje djece.

**66. Hfz. Belmin Čehajić,** sin Abdulaha i Šeherzade, rođen je 28. 5. 1997. godine u Tuzli. Osnovnu školu završio je u rodnom mjestu Banovići Selo, općina Banovići. Nakon osnovne škole upisao se u Behram-begovu medresu u Tuzli. Školovanje u Medresi je završio 2016. godine. Trenutno je student Fakulteta islamskih nauka u Sarajevu. Hifz je počeo učiti u Medresi, pred hfz. Mirnes-ef. Spahićem, a završio pred hfz. Mirsad-ef. Mrahorovićem. Hifz je polagao pred Komisijom Rijaseta Islamske zajednice u BiH, u periodu od 15. 4. 2019. godine do 29. 4. 2019. godine. Hafiska dova mu je proučena u Islamskom centru u Banovićima, 8. 6. 2019. godine.

**67. Hfz. Tarik Salihbašić,** sin Mirsada i Bahre, rođen je 3. 9. 1995. godine u Gračanici. Završio je Osnovnu školu "Hasan Kikić" u Gračanici, kao superodličan učenik. Nakon osnove škole upisao se u Behram-begovu medresu u Tuzli, koju je završio s odličnim uspjehom 2014. godine. Hifz počinje učiti u četvrtom razredu Medrese pred hfz. Nedžad-ef. Vehabovićem. Nakon Medrese upisao se na Fakultet islamskih nauka, teološki smjer, na kojem je diplomirao 2018. godine. Hifz nakon Medrese nastavlja učiti pred asistentom za Kiraet na Fakultetu islamskih nauka, mr.hfz. Abdulaziz-ef. Drkićem. Hifz je polagao pred Komisijom za hifz Rijaseta Islamske zajednice u BiH, u periodu od 23. 4. 2019. godine do 7. 5. 2019. godine. Hafiska dova mu je proučena 30. 6. 2019. godine u Bijeloj džamiji u Gračanici. Trenutno obavlja funkciju imama u džematu Maoča Nova, Medžlis IZ-e Brčko.

**68. Hfz. Leila Klapić**, kćerka Ibrahima i Sanele, rođena je 29. 8. 1999. godine u Tuzli. Živi u Priluku, općina Živinice. Osnovnu školu je završila u Šerićima. Nakon osnovne škole, 2014. godine se upisuje u Behram-begovu medresu u Tuzli, koju završava 2018. godine s odličnim uspjehom. Hifz je polagala pred Komisijom za hifz Rijaseta Islamske zajednice u BiH, u period od 17. 6. 2019. godine do 23. 6. 2019. godine. Njen muhaffiz je hfz. Abdullah Kapo. Hafiska dova joj je proučena 19. 9. 2019. u Džamiji Behram-begove medrese u Tuzli. Trenutno je studentica druge godine Farmaceutskog fakulteta Univerziteta u Tuzli.

**69. Hfz. Izet Salkanović**, sin Ifeta i Hašime, rođen je 2. 10. 1986. godine u Teočaku. Osnovnu školu "Hajrudin Mešić" završio je u rodnom Teočaku. Nakon osnovne škole, upisao se u Behram-begovu medresu u Tuzli, koju je završio 2005. godine. Nakon Medrese, školovanje je nastavio na Univerzitetu El Azhar, u Kairu, na kojem je diplomirao 2011. godine i stekao zvanje profesora islamske teologije. U školskoj 2012/2013. godini radio je kao odgajatelj u Behram-begovoj medresi. Od 2013. godine zaposlen je kao imam u džematu Kraljevići (Sapna), MIZ Zvornik. Hifz je počeo učiti 2014. godine. Hifz je polagao pred Komisijom za hifz Rijaseta Islamske zajednice u BiH, u periodu od 4. 10. 2019. godine do 18. 10. 2019. godine. Njegov muhaffiz je hfz. Mirnes-ef. Spahić. Hafiska dova mu je proučena u džematu Kraljevići (Sapna), 18. 10. 2019. godine. Oženjen je i otac dva sina.

**70. Hfz. Eldar Ćatibušić**, sin Halida i Medihe, rođen je 8. 7. 1998. godine u Tuzli. Osnovnu školu završio je u Tuzli. Nakon osnovne škole upisao se u Behram-begovu medresu u Tuzli, koju je završio 2016. godine. Nakon završetka Medrese, školovanje je nastavio na Fakultetu islamskih nauka u Sarajevu, na kojem je trenutno redovan student četvrte godine teološkog smjera. Hifz je počeo učiti dok je bio učenik Medrese, a intenzivnije je nastavio nakon što se upisao fakultet. Hifz je polagao pred Komisijom za hifz Rijaseta Islamske zajednice u BiH, u periodu od 11. 12. 2019. godine do 25. 12. 2019. godine. Njegov muhaffiz je hfz. Kenan-ef. Musić. Hafiska dova mu je proučena u Džamiji Behram-begove medrese 16. 1. 2020. godine.

**71. Hfz. Malik Huremović**, sin Džemala i Fatime, rođen 25. 6. 2001. godine u Tuzli. Mekteb je pohađao u džematu Lipnica, a prve harfove naučio kod muallima Sifet-ef. Suljića. Dalje mektebsko

obrazovanje pohađao je kod Amir-ef. Saletovića. Osnovnu školu u Lipnici je završio sa superodličnim uspjehom. Učestvovao je na raznim školskim i mektebskim takmičenjima, kao i na takmičenjima na nivou Medžlisa IZ-e Tuzla. Na takmičenjima iz kiraeta je osvajao zapažene rezultate. U Behram-begovu medresu u Tuzli upisao se 2016. godine, i iste godine se učlanio u sekciju hifza kod muhaffiza hfz. Mirnes-ef. Spahića. Početkom četvrtog razreda je završio učenje Kur'ana napamet. Hifz je polagao pred Komisijom za hifz Rijaseta Islamske zajednice u BiH, u periodu od 16. 12. 2019. do 30. 12. 2019 godine. Trenutno je učenik četvrtog razreda Behram-begove medrese u Tuzli.

## ZAKLJUČAK

Behram-begova medresa je u svom obnovljenom radu, od 1993. do danas, promovisala ukupno sedamdeset i jednog hafiza. Od tog broja dvojica su profesori u Medresi, četrdeset i devet učenika i svršenika i dvadeset učenica i svršenica Medrese. Tokom 2018. i 2019. godine, ukupno četrnaest učenika i svršenika Behram-begove medrese i jedan profesor stekli su časnu titulu hafiza Kur'ana.

Važno je naglasiti da je 2019. godina najuspješnija godina za sekciju hifza u Behram-begovoj medresi od njenog obnovljenog rada, jer je u toku 2019. godine ukupno deset učenika i svršenika Medrese, kao i jedan profesor, steklo titulu hafiza Kur'ana.

Aktivan rad voditelja sekcije hifza u Behram-begovoj medresi, veliki broj učenika koji uče hifz i koji su na putu da steknu časnu titulu hafiza Kur'ana garant su da će se, uz Allahovu pomoć, broj hafiza tuzlanske medrese iz godine u godinu stalno povećavati.